



Sesida dals

Communitgà ils

Protocol nr.

19 da december 2017

21 da december 2017

1109

Dumonda Peyer

concernent las consequenzas da las midadas en l'artitgel 93 da la constituziun federala (iniziativa "No Billag")

Resposta da la regenza

Tar la dumonda 1:

Rapports regionalis: Cun ils programs da la SSR en tut las trais linguas chantunalas (RTR, RSI, SRF) e cun quels da Radio Südostschweiz e da TV Südostschweiz dispona il Grischun oz d'ina purschida solida en il sector da las medias electronicas. Uschia èn garantids rapports audiovisuels adequats e – sco premissa indispensabla per la furmaziun da l'opiniun democratica – ina diversitad da las funtaunas en il sector dal schurnalissem d'infurmaziun sin plaun local, regional e chantunal. Gist per il Grischun cun sia diversitad linguistica, culturala, politica regionala, ma er economica è ina cuntrada da medias intacta da fitg grond'impurtanza. Las medias duain accompagnar, reflectar, ordinar e commentar las sfidas cuminaivlas. Sche la "iniziativa No Billag" vegniss acceptada, fissan ils rapports regionalis da radio e da televisiun eliminads entaifer curt temp praticamain dal tuttafatg en tut las trais regiuns linguisticas dal Grischun (RSO, TSO, Radio SRF 1, 2 Kultur, 3, 4, Musikwelle e.u.v., SRF 1, 2 ed Info a la televisiun, RSI Rete Uno, Rete Due, Rete Tre, La 1, La 2 sco er las emissiuns da Radio Rumantsch e da Televisiun Rumantscha). La pretensiun ch'ina purschida quantitativamain e qualitativamain sumeglianta sa laschia refinanziar al martgà, è absolutamain nunrealistica en chantuns muntagnards e rurals da la Svizra e cunzunt en il chantun triling Grischun. Da princip èn medias publicas ina pitga indispensabla ed a medem temp in'acquisiziun preziosa, ch'è vegnida sviluppada vinavant durant decennis, per ina democrazia cun instruments democratics directs bain sviluppads. Cun l'iniziativa vegnan eliminadas las medias publicas. La Svizra fiss uschia l'emprim e l'unic pajais en l'Europa democratica che scumandass a sasez da sustegnair uffizialmain medias publicas.

Cultura e lingua: L'infurmaziun da las medias publicas da la Svizra cumpiglia ultra da l'infurmaziun er secturs sco la furmaziun, l'integrasiun, la promoziun da la coesiun sco er il divertiment. Ina rolla impurtanta gioga plinavant l'incumbensa en il sector da la cultura. En la cuntrada mediala dal Grischun gida en spezial RTR dapi var 90 onns a mantegnair ed a promover la ritgezza culturala dal chantun. Mo gia ils 11 000 tocs da musica indigena che sa chattan en ils archivs dad RTR, che creschan ad in

crescher, e ch'ins po tadlar regularmain, furman in vair stgazi da cultura grischuna. Grazia a la cunvegna da branscha "Pacte de l'audiovisuel" èsi pussaivel da co-producir mintga onn tschintg fin sis films cun la cinematografia indigena. Il cas spezial dad RTR ha ultra da quai ina dimensiun politica da linguas: Ultra da la scola è RTR in dals motors ils pli fermes da la lingua rumantscha. Cun purschidas per tut las gruppas da vegliadetgna, en spezial er per uffants, cun programs en tut ils idioms e da tuttas variantas, n'è RTR betg mo il center dal mintgadi da la Rumantschia, mabain er in actur impurtant en connex cun la promoziun da la chapientscha inter-rumantscha. Ultra da quai èn SRG, RSO e TSO lieus da scolaziun per in grond dumber da schurnalistas e schurnalists grischuns.

Percepziun dals temas grischuns en las ulteriuras parts da la Svizra: Grazia al schurnal regional da Radio SRF, al biro regional dad SRF-TV, al team da correspundentas e correspundents dad RSI a Cuira sco er dad RTR cun programs quotidianes en spezial sin SRF vegnan temas grischuns adina puspè recepids en tut la Svizra. Pervia da la tecnologia da diffusiun digitala èsi plinavant er pussaivel da retschaiver Radio Südostschweiz e TV Südostschweiz en tut la Svizra.

Factur economic: Da las entradas da las taxas vegnan mintga onn var 32 milliuns francs en il Grischun. Da quels survegnan Radio e TV Südostschweiz (circa 63 plazzas da lavur) var 7 milliuns francs e las purschidas dad SRF, dad RSI e dad RTR (circa 180 plazzas da lavur) var 25 milliuns francs. Il service public medial da la SRG e dals emetturs concessiunads privats procura pia ch'ina part considerabla da las taxas va puspè enavos a l'economia svizra resp. grischuna. Er sche l'intent turistic na tutga betg directamain tar l'incarica da prestaziun dals emetturs concessiunads dal Grischun, profiteschan las destinaziuns turisticas dal Grischun sco er il mastergn adina puspè da l'effect collateral: Maletgs da noss chantun chattan regularmain la via sin ils visurs en tut la Svizra.

Tar la dumonda 2:

La regenza s'exprima davart projects naziunals mo, sch'il Grischun è spezialmain pertutgà u en il rom da decisiuns da conferenzas (CDEP, CDCGP e.u.v.). Pertutgà spezialmain è il Grischun questa giada senza dubi. La regenza constatescha ch'il Grischun, sco sulet chantun triling, è pertutgà en moda zunt particulara da la "iniziativa No Billag". Gia ils 7 da november 2017 ha la regenza perquai constatà explicitamain ed in corpore ch'ella recumonda da refusar la "iniziativa No Billag".



En num da la regenza

La presidenta:

B. Janom Steiner

Il chancelier:

Daniel Spadin